

आकाशवाणी रायपुर (छत्तीसगढ़)
प्रादेशिक समाचार (छत्तीसगढ़ी)

1810 बुधवार

20.11.2024

प्रमुख समाचार –

- 1— मुख्यमंत्री ह नई दिल्ली म केन्द्रीय गृहमंत्री ले भेंट करके माओवाद परभावित क्षेत्र म चलाय जात अभियान अउ सुरक्षा बल के कार्रवाई के बड़वार के दीन जानकारी।
- 2— मुख्यमंत्री ह आज नई दिल्ली म केन्द्रीय नागरिक उड्डयन मंत्री ले भेंट करीन—रईपुर एयरपोर्ट ले सिंगापुर अउ दुबई बर सोझे उड़ान जल्दी सुरू करे म बनीस सहमति।
- 3— बिटकॉइन घोटाला मामला के जांच करत ईडी के अधिकारी मन ह आज रायपुर म साइबर एक्सपर्ट गौरव मेहता के घर छापामार कार्रवाई करीन।

मुख्यमंत्री—केन्द्रीय गृहमंत्री मुलाकात

नई दिल्ली दउरा के बेरा मुख्यमंत्री विष्णुदेव साय ह आज केन्द्रीय गृहमंत्री अमित शाह ले भेंट करीन। बइठका के बेरा मुख्यमंत्री ह केन्द्रीय गृहमंत्री ल माओवाद परभावित क्षेत्र म चलाय जात अभियान अउ सुरक्षा बल के कार्रवाई के बड़वार के जानकारी दीन। मुख्यमंत्री ह बतईन कि रद्दा बनाय, शिक्षा, स्वास्थ्य अउ रोजगार के क्षेत्र म राज्य सरकार कोति ले कतकोन काम करे जात हे, जेखर ले माओवाद परभावित क्षेत्र म लोगन के सोच बदलत हे। गृहमंत्री ह राज्य सरकार कोति ले करे जात काम के प्रसंसा करीन अउ केन्द्र कोति ले हरसंभव मदद के भरोसा देवईन।

मुख्यमंत्री ह केन्द्रीय गृहमंत्री ल बतईन कि पाछु ग्यारह महीना म करीबन दू सौ माओवादी मुठभेड़ म मारे गेहे। उहें, सात सौ ले जादा माओवादी मन ह आत्मसमर्पण करीन हे।

मुख्यमंत्री—नागरिक उड्डयन मंत्री

मुख्यमंत्री विष्णुदेव साय ह आज नई दिल्ली म केन्द्रीय नागरिक उड्डयन मंत्री किंजरापु राम मोहन नायडू ले भेंट करीन। ए दउरान ओमन रईपुर के स्वामी विवेकानंद एयरपोर्ट ल अंतर्राष्ट्रीय एयरपोर्ट के दरजा देके मांग करीन। बइठका म रईपुर के स्वामी विवेकानंद एयरपोर्ट ले सिंगापुर अउ दुबई बर सोझे उड़ान जल्दी सुरू करे म सहमति बनीस। उहें, राज्य के हवाई सुविधा ल मजबूत करे अउ क्षेत्रीय हवाई अड्डा के विकास म गोठबात होइस। एखर संगेसंग रईपुर एयरपोर्ट म कार्गो हब अउ रईपुर ले पटना अउ रांची बर हवाई सेवा सुरू करे के मंजूरी मिले हे।

बइठका म मुख्यमंत्री ह बिलासपुर एयरपोर्ट बर थ्री—सी आई.एफ.आर. कैटेगरी म बड़वार के प्रस्ताव राखीन। ओमन एखर बर रेडियो नेवीगेशन उपकरण—डी.वी.ओ.आर. के स्थापना के काम ल जल्दी पूरा करे के बात किहीन। एमा केन्द्रीय मंत्री ह बिलासपुर एयरपोर्ट म हवाई जहाज के रातिहाकुन उतरे ले आवत परेसानी ल देखत एला तुरते सुरू करे निरदेस दीन। मुख्यमंत्री ह अंबिकापुर एयरपोर्ट ल रायपुर, वाराणसी, प्रयागराज अउ अयोध्या जइसन मुख्य सहर ले जोड़े बर नवा उड़ान के मांग करीन। मुख्यमंत्री ह जगदलपुर ले रईपुर के बीच कमती यात्री होय के सेती बंद कर दे गे उड़ान सेवा ल फेर ले सुरू करे के बात केन्द्रीय मंत्री ले करीन।

प्रधानमंत्री आवास योजना

प्रधानमंत्री आवास योजना के आज आठ बछर पूरा होंगे हैं। ए दउरान छत्तीसगढ़ म ए योजना म करे गे निर्माण काम खातिर मुख्यमंत्री विष्णुदेव साय ह प्रधानमंत्री नरेन्द्र मोदी के आभार जतईन हैं। ओमन किहीन कि गरीब अउ जरूरतमंद तीर उंखर खुद के पक्का मकान होवय। ए उद्देश्य ल लेके सुरू करे गे योजना ल बड़ सफलता मिले हैं। अभी तक चार करोड़ ले जादा परिवार ल पीएम आवास योजना मिले हैं। श्री साय ह किहीन कि राज्य सरकार ह प्रदेश म हर जरूरतमंद ल पक्का मकान देवाय बर प्रतिबद्ध हवय अउ ए योजना म सरल काम होवत हैं। जनजातीय समुदाय अउ विशेष संरक्षित पिछड़ी जनजाति ल घलो एखर फायदा मिलत हैं।

सुशासन क्षेत्रीय सम्मेलन

नवा रायपुर म सुशासन म काली ले दू दिवसीय क्षेत्रीय सम्मेलन राखे जाही। ए आयोजन केन्द्र सरकार के प्रशासनिक सुधार कार्मिक, लोक सिकईत अउ पेंसन मंत्रालय कोति ले छत्तीसगढ़ सरकार के मदद ले करे जाही। ए सम्मलेन के उद्देश्य राष्ट्रीय अउ राज्य स्तरीय संगठन ल लोक प्रशासन म नवाचार, जिनगी के गुणवत्ता म सुधार, सुशासन, ई-गवर्नेंस अउ डिजिटल गवर्नेंस बर सार्वजनिक समाधान खातिर अनुभव साझा करे बर एक मंच म लाना हैं। सम्मेलन के समापन सत्र ल मुख्यमंत्री विष्णुदेव साय अउ केन्द्रीय राज्यमंत्री डॉक्टर जितेन्द्र सिंह संबोधित करही। ए सम्मेलन म आने-आने विषय म पांच सत्र राखे जाही।

गिरधारी नायक-मुंगेली

छत्तीसगढ़ मानवाधिकार आयोग के कार्यवाहक अध्यक्ष गिरधारी नायक ह आज मुंगेली जिला जेल, अस्पताल, थाना, शाला भवन, वृद्धा आश्रम, बाल संरक्षण गृह अउ सासकीय प्रीमैट्रिक आदिवासी कन्या छात्रावास ल देखीन। जिला प्रशासन संग राखे गे बइठका म श्री नायक ह गुमशुदा लोगन ल जल्दी खोजे, पेंसन प्रकरण के तुरते निराकरण के संबंध म गोठबात करीन।

ईडी-बिटकॉइन मामला

बिटकॉइन घोटाला मामला के जांच करत प्रवर्तन निदेशालय-ईडी के अधिकारी मन ह आज रायपुर म साइबर एक्सपर्ट गौरव मेहता के घर म छापा मारे हैं। जांच के दउरान अधिकारी मन ह गौरव मेहता के दस्तावेज समेत घरभर के तलाशी लीन। जानकारी के मुताबिक गौरव मेहता पुणे के एक कन्सल्टेंसी कंपनी बर काम करथे। ए उही कंपनी हे जउन अमित भारद्वाज के छह हजार छह सौ करोड़ रुपिया के क्रिप्टोकॉरेसी घोटाला के जांच म पुणे पुलिस ल मदद करत हैं। आरोप हवय कि सुप्रिया सुले अउ नाना पटोले ह गौरव मेहता ले भेंट करे रिहीन अउ चुनाव म बउरे बर बिटकॉइन के बदला नगद राशि के मांग करे रिहीन। ए मामला म गौरव ह खुद तीर बिटकॉइन वॉलेट होय के जानकारी दे रिहीन। एखर बादे ले ईडी के अधिकारी ए मामला के जांच म जुटे हैं।

दुर्ग-ऑनलाइन ठगी

दुरुग के मेडिकल स्टोर्स चलइया संग ऑनलाइन ठगी करे के मामला आगू आय हे। पीड़ित संग एक कंपनी म पइसा लगाय के बाद बने फायदा देवाय के नाम म तीन लाख रुपिया के ठगी करे गेहे। ठग ह दवाई दुकान चलइया ले पाछु पन्द्रह ले तीस अगस्त के बीच मोबाइल म गोठबात करके पइसा जमा करे के झांसा दीस, जेमा पीड़ित ह आने-आने बैंक खाता म सैंतालीस घांव भुगतान करीस। तीस अगस्त के कंपनी के ऐप खुले बर बंद होंगे, जेखर बाद पीड़ित ल अपन संग ठगी होय के पता चलीस। एखर बाद पीड़ित ह एक नौ तीन शून्य म फोन करके ऑनलाइन ठगी के रिपोर्ट दर्ज करईस। दुरुग के साइबर पुलिस थाना ह अपराध दर्ज कर लेहे।

हमारा शौचालय-हमारा सम्मान अभियान

स्वच्छ भारत मिशन म काली ले देशभर म “हमारा शौचालय-हमारा सम्मान” अभियान के सुरुवात होंगे हे। दस दिसंबर तक चलइया ए अभियान म प्रदेश म साफ-सफाई अउ सौचालय के उपयोगिता ल बढ़ावा देबर कतकोन कार्यक्रम करे जाही। अभियान ल लेके कोरिया जिला के कलेक्टर चंदन त्रिपाठी ह स्वच्छ भारत मिशन के प्रबंध समिति के बइठका लीन। बइठका म “हमारा शौचालय-हमारा सम्मान” अभियान म विशेष रूप ले गोठबात करे गीस। कलेक्टर ह किहीन कि स्वच्छता अउ सौचालय के उपयोग के महत्ता समझना जरूरी हे। बइठका म फइसला ले गीस कि खुद बर सौचालय बनाय म पात्र हितग्राही ल मंजूरी पत्र दे जाही। उहें, सामुदायिक, ब्लॉक अउ जिलास्तर म सबले बने सौचालय बनाय ल लेके प्रतियोगिता राखे जाही।

अग्निवीर भर्ती-रैली

भारतीय थल सेना म अग्निवीर भर्ती बर सारीरिक दक्षता परीक्षा चार ले बारह दिसंबर तक रायगढ़ म राखे जाही। सेना भर्ती कार्यालय रईपुर ले मिले जानकारी के मुताबिक जनरल ड्यूटी पद बर दू सौ तैंतीस अरजी देवइया मन बर पांच दिसंबर के परीक्षा राखे जाही। उहें, ग्यारह दिसंबर के अग्निवीर टेक्निकल अउ ट्रेड्समैन के पद बर पन्द्रह आवेदक मनके सारीरिक दक्षता परीक्षा होही। बेमेतरा जिला प्रशासन ले मिले जानकारी के मुताबिक जिला ले सात दिसंबर के एक सौ तिहत्तर उम्मीदवार अउ ग्यारह दिसंबर के बाईस उम्मीदवार परीक्षा म संघरही। जादा जानकारी बर जिला सैनिक कल्याण बोर्ड के मोबाइल नंबर नौ छह नौ एक तीन तीन तीन एक शून्य चार म बात करे जा सकथे।

दुर्ग शिक्षक-सम्मान

दुरुग कलेक्टर ऋचा प्रकाश चौधरी ह जिला म चलाय जात आचार्य विनोबा भावे शिक्षक कार्यक्रम म तेईस जिन शिक्षक मन ल सम्मानित करीन। विनोबा ऐप ले हर महीना जिला के नवाचारी शिक्षक मन ल “पोस्ट ऑफ द मंथ” अउ आने-आने कौशल के बढ़वार म बने काम करइया मन ल इनाम दे जाथे। एखर संगेसंग बोलेंगा बचपन, टॉप थ्री कलस्टर अउ उत्कृष्ट दुर्ग कार्यक्रम म अपन योगदान देवइया शिक्षक मनके घलो सम्मान करे जाथे।

मौसम

उत्तर ले आवत ठंडा अउ सुष्क हवा के सेती प्रदेश के न्यूनतम तापमान म सरलग कमी आवत हे। सरगुजा अउ बिलासपुर संभाग के कुछेक जिला म सीतलहर चले के संभावना हवय। मौसम विज्ञानी एच.पी. चन्द्रा ह बतईन कि पच्चीस नवंबर ले दक्षिण छत्तीसगढ़ म न्यूनतम तापमान म बढ़वार हो सकत हे।